



Broj:  
Maglaj:

## PRIJEDLOG

Na osnovu člana 18. Statuta Općine Maglaj – prečišćen tekst („Službene novine Općine Maglaj“, br. 8/07, 3/08 i 6/08), a u vezi sa članom 3. stav (1) tačka e) Zakona o finansiranju političkih stranaka („Službeni glasnik BiH“, br. 95/12 i 41/16) i člana 31. Odluke o izvršavanju Budžeta/Proračuna Općine Maglaj („Službene novine Općine Maglaj“, broj: 2/25), Općinsko vijeće Maglaj, na \_\_\_\_redovnoj sjednici, održanoj\_\_\_\_\_ 2025. godine, donosi

## ODLUKU

### o raspodjeli sredstava za finansiranje političkih stranaka zastupljenih u Općinskom vijeću Maglaj za 2025. godinu

#### Član 1.

Ovom Odlukom uređuju se način i uslovi raspoređivanja sredstava za finansiranje parlamentarnih političkih stranaka koje učestvuju u radu Općinskog vijeća Maglaj.

#### Član 2.

Ukupna sredstva za finansiranje parlamentarnih grupa političkih stranaka iz člana 1. ove Odluke osigurana su u Budžetu Općine Maglaj za 2025. godinu (Razdjel 10, Glava 101 Budžeta – Općinsko vijeće, Pozicija „Transferi finansiranja parlamentarnih grupa političkih stranaka“).

#### Član 3.

Sredstva za finansiranje parlamentarnih grupa političkih stranaka koristit će se isključivo za finansiranje redovnog rada odnosno za ostvarivanje ciljeva utvrđenih njihovim programom i statutom.

#### Član 4.

Raspodjela sredstava iz člana 2. ove Odluke vršit će se na način da se:

- 30% sredstava raspoređuje jednako svim parlamentarnim grupama političkih stranaka,
- 60% od ukupnog iznosa se raspoređuje parlamentarnim grupama političkih stranaka srazmjerno broju vijećničkih mjesta, koje svaka parlamentarna grupa političke stranke ima u trenutku raspodjele,
- 10% od ukupnog iznosa raspoređuje parlamentarnim grupama srazmjerno broju vijećničkih mjesta koja pripadaju manje zastupljenom spolu.

#### Član 5.

Sredstva iz člana 4. ove Odluke doznačavat će Služba za privredu, finansije/financije i razvoj poduzetništva na račune političkih stranaka.

#### **Član 6.**

Političke stranke obavezne su dostaviti spiskove vijećnika koji čine parlamentarnu grupu u Općinskom vijeću.

Dokumentaciju o političkim strankama koje učestvuju u radu Općinskog vijeća i broju vijećničkih mjesta koja pripadaju manje zastupljenom spolu, Službi za privredu, finansije/financije i razvoj poduzetništva će blagovremeno dostavljati Služba Općinskog načelnika i Općinskog vijeća.

Naknadne promjene u vezi sa podacima iz prethodnog stava ovog člana uzet će se u obzir prilikom preračuna o raspodjeli sredstava početkom narednog mjeseca.

#### **Član 7.**

Za realizaciju ove Odluke zadužuju se Općinski načelnik, Služba za privredu, finansije/financije i razvoj poduzetništva i Služba Općinskog načelnika i Općinskog vijeća.

#### **Član 8.**

Danom stupanja na snagu ove Odluke prestaje da važi Odluka o raspodjeli sredstava za finansiranje političkih stranaka zastupljenih u Općinskom vijeću Maglaj za 2025. godinu broj: 02-04-1-117/25 od 23.01.2025. godine.

#### **Član 9.**

Ova Odluka stupa na snagu danom donošenja i bit će objavljena u „Službenim novinama Općine Maglaj“.

PREDSJEDAVAJUĆA

Aida Bašić

## O b r a z l o ž e n j e

Članom 18. Statuta Općine Maglaj – prečišćen tekst („Službene novine Općine Maglaj“, br. 8/07, 3/08 i 6/08) propisano je da Općinsko vijeće Maglaj u okviru svojih nadležnosti donosi odluke, rješenja, propise i opće akte.

Članom 3. stav (1) alineja e) Zakona o finansiranju političkih stranaka („Službeni glasnik BiH“, br. 95/12 i 41/16) propisano je da se politička stranka može finansirati iz budžeta Bosne i Hercegovine, u skladu s članom 7. ovog Zakona, entitetskih budžeta, kantonalnih budžeta i budžeta Brčko Distrikta Bosne i Hercegovine, te budžeta drugih jedinica lokalne uprave i samouprave u skladu sa zakonom.

Analognim tumačenjem člana 3. stav (1) alineja e) i člana 7. stav (1) i (6) Zakona o finansiranju političkih stranaka proizilazi da detaljan način raspodjele sredstava iz budžeta općine za finansiranje političkih stranaka, koalicija političkih stranaka, nezavisnih kandidata i lista nezavisnih kandidata treba biti regulisan aktom općinskog vijeća.


Članom 31. Odluke o izvršavanju Budžeta/Proračuna Općine Maglaj za 2025. godinu („Službene novine Općine Maglaj“, broj: 2/25) propisano je da: Sredstva utvrđena u Razdjelu 10, Glava 101 Budžeta – Općinsko vijeće, Pozicija „Transferi finansiranja parlamentarnih grupa političkih stranaka“ rasporedit će se na korisnike, tako da Općinsko vijeće svojom Odlukom utvrđuje kriterije i mjerila za finansiranje parlamentarnih grupa političkih stranaka, čije finansiranje se obezbjeđuje kroz Budžet Općine. Odluku o finansiranju političkih partija i Odluku o utvrđivanju iznosa vijećničkih paušala i naknada za vijećnike, predsjedavajućeg i dopredsjedavajućeg Općinskog vijeća će donijeti Općinsko vijeće. Raspoređena sredstva će se uplaćivati na račune političkih stranaka za rad parlamentarnih grupa u skladu sa realizacijom Budžeta.

Općinsko vijeće Maglaj je 23.01.2025. godine donijelo Odluku o raspodjeli sredstava za finansiranje političkih stranaka zastupljenih u Općinskom vijeću Maglaj za 2025. godinu broj: 02-04-1-117/25, koja je donesena na osnovu Odluke o privremenom finansiranju Općine Maglaj za period 01.01.-31.03.2025. godine. S obzirom da je Općinsko vijeće Maglaj 28.02.2025. godine donijelo Budžet Općine Maglaj za 2025. godinu, kao i Odluku o izvršavanju Budžeta/Proračuna Općine Maglaj za 2025. godinu, potrebno je da se donese nova Odluka o raspodjeli sredstava za finansiranje političkih stranaka zastupljenih u Općinskom vijeću Maglaj za 2025. godinu.

Obradivač: Emina Hasanić



PREDLAGAČ  
OPĆINSKI NAČELNIK

  
Maid Suljaković

